

بسم الله الرحمن الرحيم

1. KUHUSU FADHILA ZA MWEZI WA RAJAB:

Kwanza tufahamu kwamba mwezi wa rajab ni miongoni mwa miezi minne mitukufu, lakini hakuna hadithi yoyote sahihi iliyotaja fadhila au ibada maalumu inayopatikana katika mwezi huo, kama vile swala, funga n.k.

Amesema Ibn Hajar -Allaah amrehemu-: **“Hakuna hadithi yoyote sahihi inayofaa kutolea hoja (iliyokuja) kuelezea fadhila za mwezi wa rajab, wala kufunga kwake (mwezi huo), wala kufunga siku maalumu ya mwezi huo, wala kusimama usiku maalumu kuswali”⁽¹⁾.**

Pia amesema Imamu As-Shaukani -Allaah amrehemu-: Amesema Ally Bin Ibrahim Al-‘Attwaar katika risala yake: **“Hakika hadithi zote zilizopokewa kuhusu fadhila za mwezi wa rajab ni dhaifu au maudhuu’ (hadithi za kutunga), hazina asili yoyote”⁽²⁾.**

Na amesema Ibnul Qayyim -Allaah amrehemu-: **“Kila hadithi iliyoelezea kuhusu funga ya mwezi wa rajab au kuswali katika baadhi ya nyusiku (za mwezi huo) ni ya uwongo”⁽³⁾.**

Na alipoulizwa Ibn Uthaymin -Allaah amrehemu- akasema: **“Hauna mwezi wa rajab ziada ya (ibada) maalumu) kuliko miezi mingine mitakatifu, haujahusishwa kwa Umra, saumu, swala au kusoma Qur’an, bali ni sawa na miezi mingine mitakatifu, na hadithi zote ailizotaja fadhila za kuswali ndani yake au kufunga ni dhaifu, na hakuna hukumu yoyote ya kisheria inayoweza kujengwa juu yake”⁽⁴⁾.**

¹- Tazama kitabu: [Tabyiinul ‘Ajab] (Uk. 3).

²- Tazama kitabu [Al-Fawaa'idul majmu'ah] (Uk. 440).

³- Tazama kitabu [Al-Manaarul Muniif] (Uk. 9).

⁴- Tazama Kitabu: [Al-Liqaa'u Sshahriy] (Jz. 19, Uk. 32).

Mfano wa hadithi hizo zilizozuliwa kuhusu fadhila za Rajab:

- 1) [Rajab ni mwezi wa Allaah na Sha'bani ni mwezi wangu na Ramadhani ni mwezi wa Umma wangu, atakayefunga mwezi wa rajab kwa Imani na kutarajia malipo, atastahiki kupata radhi za Allaah Aliye mkubwa]⁽⁵⁾.**
- 2) “Mwenye kuhuisha (kuswali) usiku mmoja katika mwezi wa rajab na akafunga siku moja, Allaah atamlisha yeye katika matunda ya peponi”.**
- 3) “Ewe Allaah tubarikie sisi katika mwezi wa rajab, sha'bani na tufikishe katika mwezi wa ramadhani”.**

Amehukumu Ibn Hajar katika kitabu chake [Tabyiinul 'Ajab], kwamba hiyo ni hadithi Munkar (mbaya).

Na kuna hadithi nyingi zimekuja kuelezea fadhila za mwezi wa rajab na fadhila za kuswali usiku wa mwanzo wa mwezi huo, au usiku wa Ijumaa ya mwanzo katika mwezi huo, au kufunga siku ya Al-khamis ya mwanzo wa mwezi huo, au kusimama kuswali usiku wa katikati wa mwezi wa rajab, au usiku wa kuamkia tarehe ya ishirini na saba ya mwezi huo, lakini hakuna katika hizo hadithi yoyote ambayo ni sahihi, inayofaa kuitumia katika kutolea hoja.

Na mwongozo ulio bora ni mwongozo wa Mtume -swala na salamu zimshukie-, na mambo ya shari ni yale yalizushwa katika dini, kwa hiyo haifai kwa muislamu kuitukuza au kuifadhilisha siku, mwezi au chochote ambacho sheria haijaamrisha kutukuzwa.

⁵- Tazama kitabu [Al-Maudhu'aat] na pia kitabu [Dhai'ful Jaamiu Sswaghiir] hadithi (3094).